

上清金匱玉鏡修真指玄妙經

乃三

太上道君於上清玉虛洞紫霄林中與諸天仙衆三界真官俱在會坐說此修真指玄真經告仙衆曰下方衆生不知正道作諸罪障沉沒元邊造罪者不知洗滌修養者全非正道是致惡道盈塗生門絕跡吾今為汝宣說要言直剖玄元之旨付傳清信之流修身保命安國寧家行滿功成身超三界昇拔報祖慶延子孫秘典靈章宜加諦聽

道君曰天地網緼萬物化醇承其宿業因緣運會父母和合人受其生胎完炁足虛中降神太一居腦以鎮泥丸司命處心以納生源左居无英右結白元三真九官布列俱全肝魂肺魄脾志腎精心主藏神丹元守靈法天象地負陰抱陽分錯五行以應四時眼為日月髮為星辰眉號華蓋頭即崑崙各有宮闕安置精神萬物之中最貴而靈命生於道性稟於一物生之時神乎清靜泊乎朴散遂妄耗真不淨臭穢濁亂形神靜觀物我何踈何親守道全生為善保真愚役於物徒自苦辛

吾教正教惟勗賢英勤尋旨趣日煉時烹能除罪垢可以延齡上超三界下拔幽冥誦持禮念無退前程功成行就必證長生

道言心為形主神所居焉炁液血精心安自治其政悶悶其民淳淳其政察察其民缺缺養心之道慎于多事做不可長欲不可從志不可滿樂不可極罪莫大於可欲禍莫大於不知足若能安分止貪虛心遠欲則真源湛然靈光自瑩无思无為漸合真道矣

道言炁以形載形以炁充形完則炁留炁和則形保天地以清濁為質非炁不足以運陰陽日月以明暗分形非炁不足以交魂魄衆植彫殘獨松栢之常茂者炁堅也羣動滅寂惟龜鶴之不悴者炁住也形為留炁之舍炁是保形之符欲留形住世必先養炁至大至剛充塞乎天地之間炁聚炁靈遊乎風塵之外故知炁在人中人在炁中天地萬物莫不由炁以生者也善養炁者內以養身外以却惡百姓日用而不知焉知之脩煉然而成之可救饑寒可辟邪厲惡毒物炁能禁之

萬法千術惟炁是祖養炁之道要在慎言節食慾念室欲塞其兌閉其門綿綿若存用之不勤養形之道要在挫銳和光治於未亂安而不勞勞而不乏其力靜而不撓撓而不亂其炁外有所補內有所益養形保炁於斯備矣


道言形炁具立當保精神造化之機在於是矣然精全則神王精耗則神衰以精集神而神保以神使形而形安腎為精府太用則竭專而竭之可也心為神舍太用則勞靜而養之可也惟靜與專然而內守故曰至道之真杳杳冥冥至道之極昏昏默默無視無聽抱神以靜形將自正必靜必清無勞汝形無搖汝精少私寡慾乃可長生
道言法本無法理歸自然心因境亂法本心生立法之意救補已失而防於未萌若人犯破三奇即先補治補之完備然可進功不完而進徒勞無益補治之法混元具說其玄程功之方靈寶單言其妙前功見驗可進次功功滿成真高卑隨行有功無行魔障難成有

行持功仙真自舉善功圓滿以降吉祥性秀修行明分等級欲求天仙者當立一千三百善欲求地仙者當立三百善是道則進非道則退不履邪徑不欺闇室積行累功慈心於物忠孝友睦正己化人矜孤恤寡敬老懷幼昆蟲草木亦不可傷如此所謂善人人皆敬之天道祐之福祿隨之衆邪遠之所作必成神仙可冀矣


道言夫欲修道先須停除停者一物不生除者萬緣俱息然後收神炁海藏息丹田成性存真凡然泰定如此久之則自己元始天尊晏寂於空玄之座三萬六千神識咸朝於寶珠之中夫如是則二景合炁交神於十華之鼎男女傾心講精於五炁之爐以至移精化氣翕張於玄牝之門專炁抱神烹鍊於雄雌之器自然髮白返黑齒落重生還童復嬰長生久視全命保生以合於道當與天地齊其堅固同長久矣
道言夫學道之士立德立功鍊氣坐忘修真服御宣經演教佐國度人種種皆修是其行

業功行雖備果業雖圓亦須先度九玄七祖父母亡靈運拔生天鬼錄盡除身方得道況復世界流俗之人造惡積愆殃及根祖吾今悲愍宣說要言薦拔冥魂須憑功德可於三清像側裝衣亡人形像如法書九真妙印今彼亡人卷而戴之即禮此經識一日三部如不能儀每日志心持念尋聲救苦天尊三千遍凡百過訖禮九拜即云願度某人魂神早離幽陰超昇天界罪輕者三日得度罪重者九日還昇孝順男女切宜哀懇至心禮聖


志心敬禮虛元自然元始天尊




志心敬禮太上大道玉晨道君




志心敬禮太上玄元聖祖老君




志心敬禮傾心合道靈寶天尊



志心敬禮淨念脩真靈寶天尊



志心敬禮懺除惡跡靈寶天尊



志心敬禮得離罪障靈寶天尊



志心敬禮拔苦消障靈寶天尊



志心敬禮拯濟幽冥靈寶天尊




志心敬禮消滅苦輪靈寶天尊



志心敬禮拯拔九幽靈寶天尊



志心敬禮超昇五道靈寶天尊




志心敬禮大慈大悲救苦真人



志心敬禮大慈大悲大惠真人



志心敬禮大慈大悲拔罪真人



志心敬禮大慈大悲普救真人



禮竟休誠恭伸懺悔弟子且某甲自念謬處人案叨逢正化感天地覆載之恩荷日月照臨之德復思父母根宗生成養育念彼劬勞之大誠當薦拔之酬今對

聖真傾心懇禱伏願億曾萬祖亡過諸靈生前積劫之愆盡蒙原赦見沒淪漂之苦咸乞道運頓釋究沉遠慈光而昇度遽登玄岸承符命以朝真永離輪迴同生長樂天氣歸身常蒙道蔭且無任哀誠懇禱之至道言清信男女薦亡祝生請福穰災切宜嚴


謹香湯齋沐專意傾心禮誦

真經稱揚

聖號精誠兼備必獲感通濟度存亡殃消福至若不恭不謹性惑心疑腥膻葷色不可開經脊口磨唇汚干

聖典徒勞無益又返招殃所謂修福不如避罪也若能書印此經散施學人流傳禮誦亡魂超度地獄寧閑福善所資度延後世其有珍玩服飾平昔資財廣施寒棲濟恤貧乏此之功德亦類於前黑籍落名地司除簡神昇淨上隨願往生利祐子孫斷絕殃疰巍巍福善難可稱量是故應當勤心諦受宣行禮念普度無窮依教奉持復當敬禮一切天尊


志心敬禮虛无自然元始天尊




志心敬禮太上大道玉晨道君



志心敬禮太上玄元聖祖老君




志心敬禮常善救物天尊




志心敬禮无量度人天尊




志心敬禮極迷拔滯天尊



志心敬禮玄化利生天尊




志心敬禮金闕濟度天尊



志心敬禮无礙自在天尊




志心敬禮慈生利物天尊




志心敬禮巨功弘濟天尊




志心敬禮兩霄濟之天尊




志心敬禮超度无極天尊




志心敬禮愛物救世天尊



志心敬禮功德无量天尊



志心敬禮廻尸起骨天尊



志心敬禮煉質修真天尊



志心敬禮玄元闡教天尊




志心敬禮道德度人天尊



志心敬禮消災延壽天尊



志心敬禮宥福續命真人



志心敬禮真靜圓功真人



志心敬禮修真成道真人



禮竟恢誠恭伸禱謝弟子某甲

伏聞行成之內孝敬為先教法之中修齋是本欲報慈親之德須思禱祝之方將酬同極之恩是列嚴持之供大凡人世俱通名利為端既懷取捨之謀寧免貪癡之咎致使命辭一世魂寄九幽敢憑上善之因庶拔漂沉之苦是則心存哀懇志薦先亡宣金匱之靈章仰祈真聖禮高虛之御號俯答根宗伏願承斯道力廣濟沉淪滅无量之罪尤均闡長夜賜

大天之滿有普及群生億曾萬祖俱獲遂於飛昇積債盡克並已蒙於超邁然冀居家長幼眷屬親姻常沾吉慶之祈永荷虛元之蔭

臣无任瞻天望

聖激切屏營之至

通言玄經周畢可以傳教世間廣垂濟度爾時會眾聞此法緣洞達无為齊昇道果鄧幽諸獄无量罪魂俱獲善功應時解脫諸天仙眾歡喜敬奉作禮而退

上清金匱玉鏡修真指玄妙經